




3 2044 106 433 949

Bi
Sch 9



TOPOGRAPHIAE
BOTANICAE ET ENTOMOLOGICAE
LIPSIENSIS
SPECIMEN PRIMUM

Q V O D
AMPLISSIMI PHILOSOPHORVM ORDINIS
AVCTORITATE
DIE XIII. APRILI ANNI MDCCXCIX

DEFENDET
CHRISTIANVS FRIDERICVS SCHWAEGRICHEN
PHIL. D. ET A. A. L. L. MAG. MEDIC. BACC. SOCIETATIS
LINNAEAN. LIPSIENSIS SODALIS
LIPSIENSIS

S O C I O
IOANNO CHRISTIANO AVGVSTO CLARO
MED. BACC. SOCIET. LINNAEAN. LIPSIENSIS SODALI
COBURGO - FRANCO

LIPSIÆ
IMPRESSIT CAROLVS TAVCHNITZ

24330

THE UNIVERSITY OF CHICAGO

LIBRARY OF THE UNIVERSITY OF CHICAGO

1911

1911

1911

1911

1911

1911

1911

1911

1911

1911

1911

1911

1911

1911

1911

1911

1911

1911

1911

VIRO PRAENOBILISSIMO

CHRISTIANO. GODOFREDO
SCHWAEGRICHEN

MERCATORI · CLARISSIMO

P A T R I

SVMMO PIETATIS ET AMORIS CVLTV

PROSEQVENDO

^{un}
HOC LIBELLVM SACRVM ESSE VOLVIT

A V C T O R

293 30

RECEIVED

LIBRARY OF THE

UNIVERSITY OF MICHIGAN

ANN ARBOR, MICH.

1954

RECEIVED

LIBRARY OF THE

UNIVERSITY OF MICHIGAN

DILECTISSIME PATER!

Quamvis Tibi, quem non laudis et gratiarum actarum cupidum esse, multis et variis modis compertus essem, mentis meae sensa, ex omni tempore, silentio obvelare magis, quam verbis palam facere coactus sim: hoc tamen loco mihi cavere non possum, ne Tibi, quis animus mihi sit literis proponam. Scilicet, quum primum ad aliquid publice edendum accingar, nihil antiquius et sanctius mihi esse potest, quam ut eas studiorum primitias Tibi voveam, a quo, quaecunque in literis addiscendis hucusque profecerim, quaecunque unquam profecturus sim, ea omnia me accepisse gratissimo animo referam. Nec quidquam magis in votis est, quam ut Tibi, carissime pater, haec manca et exigua aliqua certe ratione probentur, quae etsi non satis digna bonis innu-

meris, quae de Te in res meas largiter redundarint, esse confitear, tamen imperfectiora proponere malui, quam sensui diram moram diutius iniungere. Caeterum vitam et valetudinem Tuam, mihi exoptatissimam, summi numinis curae commendô, ardentissime precatus, velit incolumen Te, et animi hilaritate usum, ad seram senectutem conservare, ut multorum liberorum res prosperas a Te constitutas et fundatas esse, laete conspicias; idque laborum dulcissimum praemium non defore firmiter sperare audeo. Ego vero ut amore paterno Tuo, et vitae morumque exemplo dignus evadam, hic mihi labor, hoc mihi semper antiquissimum studium extabit.

PROLEGOMENA.

Quum multi sint, qui plantas quaerere, per partes examinare, describere, pro re satis quidem iucunda et facili, parum vero laudabili, vsuique communi vtili habere soleant: spes tamen nunquam deerit, fore, vt expositis et perspectis iis, quae ad vitae communis promouendae vsum, ad bona et praestantia a nociuis et ingratis alimentis distinguenda, ad efficacia et salubria, ab ineptis et periculum vitae minitantibus medicamentis, seiungenda, botanica disciplina valeat: persuasio istis vel sponte oriatur, non spernendos esse, in rem herbariam locatos labores et industriam. Sed si multos opprobrio isto plantarum cognoscendarum studium, vtilitate oculos per se feriens, saepe grauare videmus, quid futurum insectorum curae et contemplationi diuinabimus, quae minutiarum studii, ludibriique speciem prae se ferre possit. Non igitur mirum, multis et variis modis saepe eos reprehendi, qui exiguorum et vilium istorum animalium curam gerant, locos natales

investigent, corpora spectatui servant. Non tamen sempiterna spretio eos vrget; nam stragibus horrendis per minutissima animalia casu exortis, silvarum vastis tractibus, quasi fulmine illato, torrefactis, arvarum laetis frugibus, ceu falcibus, abrasis, olerum splendidis frondibus ad virgultarum speciem exesis, exterriti omnes concursitant, dispersis cinerum nebulis, emissis venenorum combustorum fumis, hostem ignotum evertere tentant, qui, ipsorum ignorantia fretus, dulci pace et quiete degit, genusque magis etiam propagat; usque dum per coeli asperitatem, avium infestarum frequentiam, minutissimorum animalculorum insidias ad interitum redigitur. Tum vero temporis luculentissime patet, non inutiliter otia trivisse, qui insectorum naturae cognoscendae studerent: et omnino confitendum est, ab hisce solis tuta et rei rationi convenientia remedia, dari, darique posse; quum devastatorum istorum vilium tantum, tamque varium minetur agmen, cui fugando infinita remediorum varietate opus sit, si, finem assecuturos, nos gestare velimus. Nihilominus non soli culpandi sunt, qui insectorum investigandorum studium spernere solent, sed illi quoque ipsi, qui entomologorum nomen laudemque sectantur. Eorum enim sunt, qui in eo acquiescant, insectorum aut corporeas varietates perspexisse, aut copiam pro systematum legibus in ordinem composuisse,

aut splendore et colore amoeno cubiculorum parietes exornauisse; quae vero ad vitae victusque rationem pertineant, et quae luculente vitae communis vsui et ruralibus negotiis plurimum vtilitatis et cogitationi maxime notabilia, et iucundissima quaeque suppeditarent, ea omni modo negligere videantur. Et vero si ad entomologorum scientiam nihil aliud poscendum est, quam insectorum aliquot imagines et staturam, quae vel adeo e sola pictura cognosci potest, imaginatione et memoria tenuisse, nomina didicisse: fatendum erit, aut istos non bene de disciplina sua mereri, aut hanc ipsum parum habere commodi et communis vtilitatis. Neque tamen ex altera parte reticere possumus, esse entomologiae studium, inprimis, si quis omnium classium habitum et indolem perscrutari tentauerit, et molestia laboreque plenum et ambitu infinitum; adeo ut vel botanicorum labores valde superet. Quis enim est, qui non obstupescat fere, in Faunae Germanicae, quae dicuntur, initiis, solum insectorum coleopterorum duo fere millia specierum recenseri, eorumque numerum indies augeri; quum tamen eorum agmen a papilionum copia forte superari, ab aliorum classium civibus fere aequari noverit? quis est, quin sordida et deserta loca, quibus insecta quaerere et obseruare, vel adeo domi suae nutrire oportet, intrare aut penes se pati recuset? quis

est, quin coeli iniurias, aestatis ardentissimos calores, autumnī supervenientes imbres, vernas inundationes periculosas, hiberna silvarum silentia tolerare, reformidet: accedente, otii cuius plurimum opus foret, penuria, praemiorum summa desperatione, valetudinis instante periculo. Quare vti ad eas, quas modo dixi, perferendas molestias, laboresque suscipiendos, peculiaris quaedam mentis alacritas et pertinacia, corporis eximia firmitas, necessario postulatur, quae neque intenso literarum studio, neque vitae sedentariae veluti carcere hominibus comparatur: ita literarum expertes, in insectis colligendis, educandis, dignoscendis, saepe felicissime versari observatur; nec raro dolendum est, eosdem ignorantia sua impediri, quominus ad altiora sese elevent, et earum rerum memorabilium, quas fieri observarint, causas inuestigent, comparatione plurium et inter se, et cum iis, quae aliis animalibus eueniant, et quae iis propria corporeae facultatis sint, ad generalia de physiologia et philosophia componenda procedant; tum verecundia deterreri, vt ea quae ex ipsius naturae contemplatione didicerint, publice enarrent; a viris doctis vero omni modo vili haberi, non melius edoceri, vbi errarint, neque satis de scientia sua examinari et interrogari; vnde saepe conqueri multus audimus, quod, qui corpora viuētia perscrutantur, non scribant, qui scribant, non perscrutati sint. Ea-

que ipsa inter causas est, propter quas, etiam in Germania nostra, quae alias terras entomologorum frequentia omnino superare videtur, saepius insectorum formas describi legamus, quam eorundem habitum et indolem enarrari. Qua in re etsi insectorum species, antequam rite a similium turba accurate distinctae et extricatae sint, tute et subtiliter observari non posse, eosque, qui earum diuersitatem exponant, de studio suo bene mereri, nullus nego: tamen etiam in iis speciebus, quae satis notae sunt, vitae generis et metamorphosium rationem saepe nimis negligi, reprehendere audeo; quod quidem negligentiae documentum, etsi in systemate conscripto, spatii exiguitati largimur: in enumerando tamen insectorum, cuidam regioni indigenarum, copia studiosius vitari, et loci opportunitas suppeditat, et vero etiam rei ratio exigit; id enim nobis postulare possumus, vt, qui animalcula quaedam se collegisse profiteatur, eorundem locum natalem, habitum, consuetudinem, simul obseruata, proponat. Et hoc ipsum est, quod vtilem et cogitationi dignam et acceptam, istarum minutiarum perscrutationem reddere valeat. Sic enim augentur physiologiae vniuersae capita; illustrantur, quae similia aliorum animalium ipsiusque hominis naturae insecta habeant, quae dissimilia; indagatur via, qua devastationes immensae procurentur, qua ad nostra commoda operari, inscia insecta docean-

tur, qua ad morborum impetus infringendos, inter medicamina efficacia recipi queant. Illud autem, commodis plenum, optime naturalis historiae amantes tum efficient, quum ab exterorum insectorum, magnitudine et venustate praepollentium, collectione se abstinuerint, inque terrae patriae incolas oculorum obtutum converterint: quid enim iuvat, multorum insectorum longam seriem mente, nominumque longas lineas memoria percepisse, si, quae nobiscum habitant, damnaque inferunt, neque cognoscere, neque prudentia vincere didicerimus. Rectius itaque civibus operam navabimus, si agri nostri incolas recensemus: eorum vero describendorum non aptior facile locus invenitur, quam faunae entomologicae titulus; nam in systematicis libris non sufficiens permittitur spatium. Ibi vero constituendum erit primum, quae insectae adsint, deinde, quem victum sibi quaerant, postea, quod vitae genus gerant, tum, quae noxia vel quae commoda hominibus comparent, tandem, si hoc addere lubet, num vires morbis medentes habeant, et qua ratione applicari possint. Quoad victus rationem cuique facile botanicae disciplinae necessitas et arctus nexus elucet, nec potest entomologus dici, qui non certam, etsi quovis modo acquisitam, plantarum multarum notitiam calleat; nec vero etiam botanicus, inprimis in loco de plantarum morbis, bene proficiet, nisi in-

sectorum certe aliquam scientiam acquisiverit. Quare commodissimum omnino visum est, utramque disciplinam ita iungere, ut plantarum et denique insectorum turbas enumeremus, praemisso de soli, regionisque reliquo habitu, sermone; nam et plantas sponte crescentes et animalia iis victitantia, soli, illa producentis, haec recondentis, mira quaedam conuenientia intercedit. Scilicet infitias nemo ibit, insectorum specierum varietatem pendere ex arborum plantarumque natura, quarum quaelibet sua pericularia nutrire solet: sed hoc etiam expertum satis est, quamque terrae mixtionem suas peculiare habere plantas. Ita necessario sequitur, in regionibus calcareis alias, in argillosis alias, in arenosis alias plantas progerminare, alia insecta degere. Sed ne de plantis quidem omnibus satis exploratum habemus, cui potissimum humo quaelibet innasci soleat, quamque in eo, aut alio, minus sibi conveniente, formam assumat, etsi ea ad physiologiam et pathologiam plantarum, et ad geographiam botanicam, et ad oeconomicas medicasque rationes plurimum valere appareat. Neque tamen ea res, si modo attente et studiose rerum naturalium curam agimus, inventu difficilis est. Quum enim per regiones variae indolis itinera fecimus; ex omnium, quouis loco inuentarum, plantarum, habitusque differentiarum perspectarum, complexu, fingitur nobis, fere nescientibus, quaedam quasi soli cuiusque

uniuersa notio; qua in plantis mire adiuuamur ita, vt, solo fugituo agri alicuius inspectu, possimus quasi praedicare, quaenam ibi vegetabilia, et quam conditione inuenturi simus. Neque caret hoc vtilitate communi; si enim probe tenueris, quem habitum in solo proposito planta quaedam, verbi causa fruges, natura sit, aut quae plantae spontaneae fruges obiecturae; vel arbores exhausturae, aut particulas nutrititias crepturae sint; tum et humi varie instituta laedificatione, et tempore, quo inimicae accrescere solent, cognito, eas interimere, aut alio modo tollere, felici successu conaberis. Iam etsi, quam plurimae plantae, certe Germanicae, glebarum mixtionem malint, quam in quoque solo speciem induant, notum sit, supersunt tamen multae, de quibus ista nos adhuc lateant. Sed quod insecta attinet, multa nobis ignorantur; nam haec vel illa in arena fodere, alia in solo pingui nasci, scimus: sed num pro diuersa plantarum, fruticum, arborumque eiusdem speciei natura, diuersae species insectorum adsint, vel an eadem species ratione ciborum, per soli mixtionem in plantis aliter comparatorum, variare soleat, id plerumque ignoratur. Cuius exemplum forte est Lúcanus Ceruus, in quercu maior, in salice multo minor; est hic igitur varietas ratione plantae: alia specierum pro climatis solique, ratione et, inde dependente, plantarum structura non desunt,

si, in montosis, et australioribus species insectorum natas, nostratibus eiusdem nominis maiores et splendidiore evadere docemur. Quod praeterea capita historiae naturalis, de quibus loquimur, attinet, superest, ut fateamur, latere: num species quaedam insectorum pro diversa arborum solique, eas ferentis, habitu, diversum vitae genus agant, quatenus in quadam agri conformatione maxime noxia, et quae minus sint, in quo regionum genere virium medicinalium plus in se animalcula recondant. Ea vero pleraque ita exquiri, literisque mandari posse reor, ut, quicumque Faunam Floramve scribat, praemittat quaedam de terrae suae habitu et natura, deinde cuique speciei animalium et plantarum notulam adiungat quae eius locum natalem designet, et victus rationem indicet, et num frequens ista aut parca adsit, moneat. Quod si propositum viris, scientiae naturalis peritioribus, non displicuerit, equidem eiusmodi topographiam studiose elaborare suspicerem: iam vero, exempli causa, topographiae Lipsiensis primas lineas ita describam, ut praemissis de universa soli nostri conditione quibusdam, descriptisque locis Florae et Faunae memorabilibus, plantisque aliquibus, quae loco cuique maxime peculiare, et, ad eius indolem idea concipiendam et tradendam, aptissimae videantur, nominatis: ad specialiora transeam. Ad integram regionis topographiam naturalem pertinent loco-

rum omnium descriptio, lapidum, plantarum, animalium omnium definitio; coeli, ventorum, climatis, fatorum narratio; et omnium, de vegetatione, victu, et oeconomia animalium et plantarum notandorum, epitome; qualem integram quum hic exhibere nec velim, nec possim; quaedam sola eius capita digito monstrabo; et quum, virorum clarissimorum, Boehmeri, Schreberi, Hedwigii, et Baumgartenii opera, de florae nostrae civibus sufficienter expositum sit, eorum tantum aliquos nominari satis esto: animalium maiorum et vermium historia, quum aut plenius exposita, aut summis difficultatibus implicita sit, plane praetermittetur: insectorum vero catalogi initia afferentur. Sed quum arbitrer, instituti mei rationem, iis, quae mox expositurus sim, satis apparere, et quum loci oportunitas, longae nominum seriei proponendae parum favere videatur; iam catalogum istum in aliud tempus servare invitatus cogor. Caeterum lectorem de meliori monitum velim, esse hoc meum conamen, nil quam periculum, quod nunc abiiciendum; an amplius resumendum, tempore maturatum, industria expolitum repetere ausim, peritiorum iudicio pendebit.

LOCORVM DESCRIPTIO.

Agri nostri habitus talis est, quem, primo intuitu, plantis multis et rarioribus, insectisque generandis non favere perhibueris. Est enim ei magna planities superficiei, silvarum exigua varietas; desunt montes herbidi, silvae vastae, saxa frequentia, rupesque solidae, nisi paullo longius excurrere velimus. Arvorum cultura diligentissima, si, lactissimis frugibus pomorumque splendore, ambulantium oculos delectare satagit: insectorum simul amanti, plantarumque spontanearum cupido spem infringit, labores illudit. Qua de re videmus quotannis hoc vel illo loco plantulam dilectam diro aratro eversam; insectum, sede et domicilio deperdito, oculorum conspectum et observantiam fugisse. Sed quis rusticanis hortulanisque hoc in opprobrium vertet, quum terrae natura ipsos magno pere ad labores invitet? Est enim solum maxima e parte fertile laudisque plenum; constat nempe terra luto, humoque pingui commixta, hic illic, inprimis in elatioribus campis, arena distenta. Lapides substrati; in aliquibus locis, vt prope pagos *Zschocher* dictos, nudi prodeuntes, argillosi generis sunt et argillae vulgaris induratae *Weneri* nomine veneunt;

paullo remotius versus orientem saxum porphyrium, versus meridiem saxa arenaria et calcareus aequabilis, qui versus occidentalem plagam continuatur, et in nonnullis locis gypsa-
ceam naturam, verbi causa prope Dürreberg, pago ob salinas electorales perquam celeberrimo, induit, inveniuntur. Quae alia lapidum genera occurrunt, granites, silices pyromachus, petrefactis saepe distinctus, corneus, Feldspathum, Quarzum, et schistosus is, qui lapis Lydius vocatur, aliaque; ea non terrae huic innata, sed per aquarum cursum invecta esse videntur, trituque diuturno angulis orbata. Neque abundat regio lapidum, in arvis et pratis prosectorum, profusione, quare difficiliora carabi staphilini et consimilia genera investigatu, sub humo latent. Saxorum vero muscis tectorum et umbrosorum, coleoptratis ditissimarum latebrarum, inopia est; nisi quod prope Grimmam aliquid rupium, nec tamen entomologiae satis aptum, conspiciatur. Adsunt vero prata humida, spongiosa, turfosa, maxime iuxta Partham fluvium, ibi muscorum, aliarumque plantarum paludosarum abundantia vestigia pristinae, quae nostrae regioni fuit, indolis satis ostendunt: paludes olim totam plagam septentrionalem occuparunt, ut ii ipsi loci, qui a cerdonibus habitantur nomenque gerunt, olim stagnis repleta fuerint. Ibi sunt insectorum aquaticorum agmina. Versus occidentem videmus prata sil-

vasque undarum impetui obnoxia, per veris magnam partem fossas et depressiora loca, aqua stagnante plena, foenisecii spem saepius fallere; entomologo laetam dyticorum messem comparare.

Vegetabilium autem ea natura est. Prope urbem, qui loci humido, lutoso, depressoque solo sunt, laete provenire gaudemus quercus, carpinos, acer campæstre, tiliæ: betulas, fagosque et pinus frustra quaesierimus. Quamobrem nemora haec umbrosa, humida, muscorum pulvinaria, levocoi, aliorum, primularum, graminum plurima ferre observatur; suntque iisdem propria veronica montana, quæ alias vix, nisi locis valde montosis, occurrere solet, bromus giganteus, euphorbia dulcis et palustris, phascum patens, Leskia attenuata, fissidens bryoides copiosissimus, hypnum alopecurum, nec non fungorum imprimis sphaeriarum permulta; pratis vero contentis veronica longifolia, thalictrum flavum et similia. Hac situs ratione exposita, nemini non incidit, adesse nobis insectorum, paludibus faventium, copiam, tipularum, culicum, ephemerarum, phryganearum, phalaenarum et imprimis noctuarum, quarum erucæ plantis supra nominatis vescantur; verbi causa: noctuæ Fimbriæ, Ianthinae, Pronubæ, Orbonæ, pulmonariæ, L albi, pallentis, aliorum. Coleopterorum vero inopiam conquerimur; desunt carabi maiores, si granulatum

Linn. excipias, et multa alia, quorum nomina recenseri longum foret. Et alia quoque causa est, quae harum silvarum divitias imminuat; ea, quod lingua et trunci putridi rarius inveniantur, et quod aqua, fluviiis egressa, multa nobis auferat. Huius quidem indolis omnia ista nemora invenimus, quae Plissam et Elystrum, fluvios, comitantur. Alia vero omnino res est, ubi ab eorum fluviorum tardo et obscuro cursu utrinque ascenderimus ad loca altiora; tum enim mox invenimus solum siccius, pyromachorum frequentiam, nemora arborum varietate, plantarum novitate, insectorum agminibus praepollentia; adsunt betulae, pinus, rarius tamen fagi et abietes. Habemus ericam, airam flexuosam, spartium, genistas, pteridem, polypodia maiora, trichostomum pallidum, lichenes crustaccos, terrae instratos, et inter insecta cerambyces, buprestides, cicindelas, bombyces versicolorum, V nigrum, bicolorum, fagi, Milhauseri, noctuas matronulam, fraxini, augurem, gryllum coeruleum, hemerobium phalaenoidem et similia. Quare non peccare mihi videor, si omnes regionis nostrae partes ita in duas classes dispescam, ut alteras pingues, alteras macras nuncupem; quam utramque classem rursus dividerem in umbrosas et apertas. Umbrosi sunt loci silvatici aut arboribus tecti, aperta vero prata et arva; nam etsi paucae tantum plantae et insecta mere arvicolae et praticolae sint, videntur tamen et haec

quendam delectum facere. Scilicet arva aperta pingua largiuntur phascos subulatum, crispum, dicranum Schreberi, carabum ustulatum, elaphros aquaticum, riparium, flavipedem, aliosque: arva vero macra phascos ostendunt copiose piliferum, muticum, dicranum purpureum, hypnum albicans, iisque supersilientem panorpam hiemalem, scaritem arenarium, cindelam Germanicam, carabum auratum frequentissimum et alia. Quodsi vero etiam in macris, siccioribus, elatioribus locos offenderimus humidos, eorum tamen indolem a depressorum habitu ita differre intelligimus, ut plantarum inveniamus diversas species, carices hirtam, aliasque huic solo proprias, potentillam supinam, spergulam nodosam, anthocero-tes, blasiam, Ricciam glaucam, minimam, agaricos, et insectorum elaphros riparium, paludosum, elophoros minores; in umbrosis autem; caricem tomentosam, brizoidem, iungermanniam bicuspidatam, et aliam, ei similem, minorem ignotam, multifidam, lichenem horizontalem, caninum, agaricos plures, carabum hortensem, Inquisitorem, parumpunctatum, holosericeum.

Sed ut agri nostri habitus plene et perfecte describatur, necesse est, singula, quoque loca depingi; quem, si quis, recte teneat, naturae curiosus, aliam regionem ingressus, statim intelliget et comparatione colliget, quibus modis haec

terra a patria sua differat, et quibus eiusdem similis sit; quae ibi inveniri possint, quomodo inquiri debeant; oekonomus: quibus inimicis dimicandum, quomodo dimicandum sit. Quare nunc singula enarrabo initium a propioribus factururus, et breviter quasdam plantas et insecta, iis peculiaria eorumque naturam indigitantia enumerabo, caeteris, quae simul communia aliis quoque locis adsunt, quippe in catalogo meo nominandis, neglectis.

Est pratum in plaga occidentali, *die Vogehwiese* dictum, solo duro, limoso, lapidibus carente, gramine dense irretito tectum; carduis lanceolato, polyacantho, crispo, serratulis arvensi et tinctoria, geranio pratensi, salicetis, plantisque ruderata amantibus, fertile; depressum, inundationibus obnoxium, stagnulis interstinctum, vere plenis, aestate ex parte exsiccandis; sed plantis palustribus, (excepta arundine, typhis, alismate, caricibus, laete vigentibus) muscisque, praeter fissidentem bryoidem, collemata aliquot, etiam lichenibus carens. Ibi mirae dyticorum et hydrophilorum, praesertim minorum, heteroceri, donaciarum, hemipterorum aquatiliu turbae; papilionum maiorum et minorum caritas, nevropterorum et dipterorum frequentia. Similis naturae sunt prata maiora silvarum, ripas Plissae et Elystri fluviorum comitantium, qua-

rum tamen prata minora et tramites muscos et plantas, umbrosa amantes, alunt.

Diversa ab his maxime sunt, prata, Partham rivum ambientia, quippe muscis palustribus, hypno nitente, cuspidato, stellato, Leskea dendroide, mnio cuspidato et similibus, caricibus plurimis, chara vulgari, acoro Calamo, salice capraea aliisque, carduo palustri, conico oleraceo, comaro palustri, iunco filiformi agrostide Calamagrostide, aira coerulea, caespitosa ditiora, humo pingui, nigra farcta; per totam aetatem subhumida, vere spongiosa, dyticis non adeo abundantia, sed zygaenis minoribus, papilione Hylle, Typhone aliisque plebeiis ruralibus, bombyce falcula, saperda cardui, noctua L albo, furcifer, aliisque similis indolis, ditissima.

Vicinus locus est iuxta rivulum *dię Rüzschke*, qui poetarum ambulacri nomine venit. Ibi populi nigrae, salicum copia, olerumque laetissimā arva, humo pingui nigra, adest ribesii nigri aliorumque virgultorum quantitas, multae alticae, aliaque agricolis infesta animalcula, geometrae, noctuae, Sesia tipuliformis occurrunt.

Silva urbi proxima non fusius describenda est, quum eius habitus ratio supra data sit; loco de silvarum urbi proximarum indole.

Sed alius nos tenebit locus, Faunae et Florae gravissimus; collis nempe nemore tectus, qui *Bieniz* vocatur. Hic locus, etsi collis nomen vix mereatur, quum parum elevatus sit, omnia habet, quae in montosis occurrunt. Situs est versus occidentem iuxta viam publicam Martisburgensem; e campis siccis arenosis, septentrionem versus, leniter ascendit altius, paullo magis praeceps decessurus; occidente prato per fonticulum irrigato, septentrione prato, alneto, campis humidis cingitur. Multas arbores in vertice alit, quercus, carpinos, populum tremulam, betulas albas, prunum spinosam, oxycantham, tiliās cordatas, paucasque pinus silvestres satas alit, et vero plantas, quae in aliis agri nostri regionibus non reperiuntur et proprie monticolae sunt. In colle, qui siccus et ex parte umbrosus est, inveniuntur hypericum montanum, vincetoxicum, antherica liliago et ramosum, phyteuma spicata et hemisphaerica, silene nutans, lychnis viscosa, galium silvestre, silvaticum, rotundifolium interdum, coronilla varia, cistus helianthemum, pulmonaria angustifolia, primula officinalis, liliū Martagon, Scorzonera humilis: in colliculo et agris orientalibus, anemone Pulsatilla, festuca myurus, aira canescens, festuca ovina, polycnemum arvense, carex humilis, montana, praecox Schreberi, scabiosa ochroleuca, ornithopus perpusillus, orchis Morio, sambucina, cladonia rangiferina,

papillaria et similes plantae. Paucorum passuum intervallo, occidentem versus, solum in pratum deprimitur, fonticulo sulcatum, ad cuius originem plantae paludosae, carices permultae, festuca arundinacea, spiraea filipendula, hypnum scorpioides et filicinum laeta exstant. Pratum, aquulae istius propagine cinctum, versus septentrionem abit, exhibet *Cirsium Halleri*, sive varietatem *cardui acaulis*, *tussilagines hybridam* et *Petasiten*, lotum siliquosum, *gentianam Pnevmonanthen*, *laserpitium Prutenicum*, *Peucedanum officinale*, *Iridem Sibircam*, *ophioglossum vulgatum*, in agris, prati ditioni subductis, vicinis, *antirrhinum Elatine*, spurium, minus et quae sunt reliqua. Hic igitur, loco, qui uno horae quadrante, concitato passu, permeari posset, plantarum summa varietas est: non mirum igitur insecta plurima ibi oculo offerri, inter quae, catalogo taediose longo suppresso, notare lubet, *chrysomelas*, *cistelas*, *melolonthas* et alia, de quibus in catalogo insectorum Lipsiensium dicendum, *gryllos*, *cimices*, *cicadas* imprimis autem *tinearum* et *pyralidum* Linnaci miram copiam et diversitatem dari. Proprius vero huic loco *papilio plebeius ruralis* quidam, et *papilio silvanus*, *carabus haemorrhoidalis*, *cassida nobilis* et *margaritacea*, *noctuae augur*, *bombyx V nigrum* et alia.

Laudanda vero praeprimis silva, quae *Academica* dicitur, est; in qua, etsi plantarum non tanta sit varietas, nonnullae

tamen rariores occurrunt: trientalis Europaea, stellaria uliginosa, bromus asper, elymi, sanicula Europaea, pyrolae, vacinium Vitis idaea, serapiades longifolia, latifolia, polypodia Filix mas et femina, lycopodium clavatum, Buxbaumia foliosa, trichostomum pallidum et alia. Arborum vero haec ratio est, ut, quae silvae pars urbi propior sit, quercubus, populis tremulis, betula alba, tiliis, carpinis, corylis, paucioribusque fagis componatur, sitque silva in marginalibus sicca et arenosolutosa, media vero lutosa et umbrosa; contra versus meridiem: populus tremula et betula alba, inmistis paucis pinibus silvestribus, et abietibus, praedominentur, solumque siccus et erica ubique tectum. Ea soli, situs, arborumque varietate, totiusque tractus vastitudine tanta insectorum copia fovetur, quantam exspectari vix liceat; omnia enim, quae in silvis Lipsiae propioribus vitam degunt, simul cum aliis plurimis in hoc unum quasi receptaculum congeruntur. Sunt hic coleoptera plurima, de quibus alio loco agemus, lepidoptera fere plura; propria vero sunt noctua Matronula, bombyx bicolora, rosea versicolora, cossus Terebra et permulta alia.

Neque plane praeterire possum pinetum, quod urbi proximum est, et ad pagum, nomine *Lindenthal*, iungitur, quippe quia plura sibi peculiariter recondat. Est nemus mediae magnitudinis, campis siccioribus circumdatum, solo asperiore, du-

riore, lutoso; pinus silvestres continet immistasque quercus, populos, betulas, salices. Plantas paucas fert, silenem nutantem, phascum nitidum, hypnum Cristam castrensem, lichenum physodem fructificantem, et airam flexuosam, spartium alibi nobis rarum; continet insecta pinicolas, sphingem pinastri, bombycem pini, noctuam piniperdam, phalaenam pinariam, tenthredinem pini et alia et praeterea multa, quae in silva Academica occurrunt, etsi minori copia.

Praeterea entomologiae aptae sunt viae publice, populis sacilibusque refertae, vbi callidium salicis, cossus ligniperda, sesia apiformis et asiliformis, tipula pectinicornis et alia nascuntur: neque minus laudandi horti suburbani; inter quos inprimis Bosianus, ab arte neglectus, multas plantas spontaneas, verbi causa fumariam cavam, capnoidem, antirrhinum Cymbalariam, helleborum hiemalem, digitalem ferrugineam, Scillam amoenam, ornithogalum nutans et alia profert, et coleoptera plura, noctuas Fimbriam, Pronubam, Ianthinam, bombyces pomaria habitantes, papilionem Prorsam et Levanam, vesparum, crabonum, apum, philanthorum, muscarum et syrphorum multas species alit.

Sed ne remotiora plane neglexisse videar, dicendum erit de oppidorum vicinorum agro; in eoque me non errare arbitror, dum ad Faunae nostrae ambitum eos locos transferam,

quum in Floris Lipsiensibus eorum saepe mentio fiat, sintque ipsi satis vicini, ut ad eos iter reditumque uno die emetiri queamus. Sed de his, praesertim entomologica ratione, paucis agendum erit, quum et libelli huius conditio brevitatem exposcat, et me istos agros propter distantiam ab urbe, laboribus academicis impeditum, non ita studiose et frequenter percurrere, ac opus fuerit, potuisse doleam.

Leucopetram quae via tendit, in ea mutatio agri plani et depressi in collinum conspicua est. Solum sensim eam pinguem et tenacem indolem, coloremque nigrum induit, quibus vicinae Thuringiae laetissima arva superbiunt, estque in siccioribus durissimum in depressis spongiosum, et si Numburgum iter continuatur, calcareos lapides argillosos excipere observantur. Silvae e quercetorum umbris in mixta pinuum, fagorum, quercuum, abietum, plantaria immutantur et insecta et plantae monticolae apparent, ut andropogon Ischaemum, reseda lutea et luteola, psora lentigera, chrysomela cerealis. Lamia fuliginator et alia.

Leucopetram et Martisburgum inter locus botanophilis gravissimus pagus *Koetschau* est, vbi solo, per salinarum culturam frequenti sale impraegnato, plantae multae maritimae proveniunt ut, aster Tripolium, glaux maritima, plantago maritima et subulata, Scirpus maritimus, chenopodium maritimum, Samolus Valerandi, et alia plura; insectorum vero non tanta fertilitas est.

Martisburgi ager planitiei Lipsiensis similis pauca sibi propria habet, nisi hippurim vulgarem; solum pingue silvaeque umbrosae quercubus, alnis, et similis naturae arboribus refertae. Sed versus occidentem et septentrionem incipiunt colles in montes hercynicos abituri, qui plantarum rariorum fertilissimi sunt; et in Flora Halensi a Leysero conscripta, Mansfeldiae nomine saepe alleguntur; astragali exscapus, arenarius, Danicus, pilosus, cynosurus durus, euphorbia Gerardiana, marrubium supinum, Creticum, aliaque; insecta vero plurima, quae Halensia dicuntur, sedes ibi et domicilia habent.

Hala Saxonum ad Florae nostrae campum non duci solet, etsi non adeo remota, quoniam alienae ditionis est: sed quum in Flora Halensi a Leysero conscripta, planta quaedam, comarum palustre, recensita sit, cuius non alius locus, quam paludes prope Schönfeld, pagum, urbi nostrae valde vicinum, indicetur, possemus nos quasi res repetere et plantas Halenses nostris adnumerare.

Ad Halam usque continuantur silvae, ad Plissae Elystrique ripas eodem habitu, quo Lipsiae sunt eademque continent. Plaga reliqua nostra septentrionalis, quippe frugibus lactissimis obtecta, nemoribusque orbata plantarum nihil memorandi profert; sed prope *Bitterfeld* silvae et betuleta vastiora incipiunt, quae ad silvas Anhaltinas se adiungunt, plantisque

et magis etiam insectis certo ditissima, etsi nondum satis per-
lustrata. *Delitzsch* oppidum est agro nobis parum apto; Me-
morabilius vero *Düben*, silvis vastioribus soloque arenoso cin-
gitur; satis liquet, regiones sabulosas, si modo silvis abun-
dent, multa alibi rariora gignere. Agri huius divitias, quum
anno praeterito, non tardo satis passu, permeabam et quoad
insecta, et quoad plantas, de quibus alio loco dicetur, sum-
mas esse, ita perspexi, ut, non esse mihi eum lustrandi otium,
valde dolerem

Versus orientem pauca propiora notabilia habemus, ex-
cepto colle templi Sanctae Theclae, qui in Schreberi spicile-
gio saepe allegatur sub agrostidis vinealis, osmundae lunariae,
alyssi incani, seseli saxifragi, caricis montanae, saginae erectae
mentionem et silva *der Wilheisch* dicta, quae arborum copia
mixtarum entomologo aliqua, botanico vix aliquid offert; sed
prope ea, in agro Baunsdorfiano parvum pinetum est, bom-
byce pini et noctua piniperda saepe male abundans. Si vero
in ea plaga continuatum est, pervenitur ad silvas betula alba et
pino silvestri, sed aliis quoque arboribus refertas prope pagum
Machern, quae insectis ditissimae sunt. Extenduntur versus
meridiem ad *Brandis* et *Polenz* ita, ut versus Muldam flu-
vium vastiores sint, solumque colliculosum obtegant. Ea
regio plantis et insectis generandis omnium nostrarum aptis-

sima propter longiorem distantiam iusto tempore nondum satis percursa est; sed in Oehlmanni; noto papilionum et peritissimo inquisitore, cistulis, qui quotannis expeditionem quasi in illam regionem molitur, praestantissima quaeque inventa esse miratus sum. Habet eadem regio hoc peculiare, quod porphyria strata recondat; versus Grimmam vero Muldam rupibus, argilla vulgari indurata constantibus, cingat, quarum cacumina nemoribus betularum, quercuumque apte nobis teguntur. Tractus isti silvosi procedunt ad meridionalem plagam usque ita, ut prope *Naunhof* depressiores et humidiores sint, pinibusque magis abundant, elatiora vero postea petant et versus *Colditz* solum colliculosum investiant ramosque usque ad silvam nostram Academicam porrigant, cuius incolas nobis dilectos, haud dubie illis debemus. Adnumerari iisdem silvaticis potest nemus pagum *Steinbach* circumiens, quod valde memorabile et locus nostrorum proximus est, qui phalaenam Tau alere soleat.

Etiam *Zizensis* ager non debet negligi, quippe nemoribus refertus, soloque pingui maxime fertili ornatus; collibus interstinctus, quorum interiora mox calcaream naturam induunt, quae, versus *Geram*, exteriori montium figura et coma manifeste oculos ferit. Continuantur ad Zizam usque silvae Plissae et Elystri comites, eodem, quo Lipsiae sunt, habitu; Zizen-

siumque agri indolem magis variam reddunt, cuius et ipsius divitiae Lipsiae nimis ignorantur. Ziza si ad Lipsiam tendimus, propè Zwenkau nemus iucundum, *der Horst* offendimus, silvae Academicae simile, etsi ambitu minus: si vero ad occidentem converterimus, per arva fertilia, studiosissime culta, itinerati, ad Leucopetram redimus, unde supra digressi sumus.

De coeli et tempestatis varietatibus, aliisque, quae in vitam et propagationem plantarum et insectorum efficacia sunt.

Quod ad coeli temperiem et caloris, frigorisque vicissitudines attinet, notandum illud videtur, constantiam valde desiderari. Mox enim nebularum caligine vernalium et autumnalium, mox ventorum impetu, mox solis aestivi radiis perturbamur, ita tamen, ut aestus modicos, nebulas vero, pluviososque et ventosos dies frequentiores et molestiores habeamus, etsi imbris, grandine et turbinibus, quae in confini Thuringia saepe furiant, plerumque nobis parceatur. Quae quidem res florum nostrae haud exiguo fructu est. Si enim siccitate solum maximam partem lutosum exurit, pereunt

plantarum radiculæ, glebarum duritiæ suffocatae; uruntur muscorum sedes, duro cibo insecta debilitantur; si vero imbres et pluviae effusae ceciderint, solum ita contunditur, ut, areae instar induratum, fruges depauperatas ferat. Sed rarius aestum, quam coelum turbidum et imbres conquerimur, eaque causa est, quae minimarum plantarum fructum et propagationem tueatur, quae silvarum raritate et tenuitate, umbrarumque deficientia mox periturae essent. Itaque muscos florere nobis gaudemus, qui in aliis regionibus, silvarum vastitudine nostras haud praepollentibus; nunquam fructus ferre accusentur nobisque gramina et aliae similis naturae plantae servantur, agricolarum nunquam remittente labore interiturae; cuius testimonio afferam Leskiam dendroidem, attenuatum, hypnum squarrosum, stellatum, filicinum, quorum posteriora florere, etsi non semper fructus maturare videmus.

Sed observanti tamen firmiter persuadetur, et hac in causa, floram iacturas perperam esse. Nam, exempli gratia, prata Schönfeldica iam non largiuntur splachnum ampullaceum, alneta eiusdem loci carent lichene pulmonario, iungermanniis et aliis aliquot; cuius causam pratorum, diligenter per fossam exsiccatorum et terrae per ventos ex agris elatioribus vicinis advectae copiam subesse, Hedwigius, praeceptor summo sem-

per desiderio revocandus, docuit, atque similia, si dicere fas est, infortunia, florum in posterum minantur.

Alia res, qua Florae cives mutantur, extirpentur, au-
geanturve, est crebra exundatio aquarum; quotannis vere
silvae et prata fluviis adiacentia libidinoso aquae torrente
teguntur, nonnunquam altiore et pagis villisque pericula mi-
nante. Quae undarum vis ut multa nobis semina attulit, qua-
rum soboles, monticolas, in plano nostro agro provenire
miramur, ita alias interdum nobis abripit; aut eorum locos
natales ita mutat, ut vix amplius victum istae inveniant. Et
magis etiam et luculentius aquae efficacia in insectorum historia
patet. Insecta enim, corio duriore tecta, afferuntur, vitamque
natatu mire servatam, hac in terra, posita prole, condunt;
cuius quidem rei exemplum maxime in dyticatorum genere est.
Caeterum mirandum est, insecta perfecta coleopterorum, aut
pupas lepidopterorum, etsi aqua diu circumlatas, vitam tamen
servare; nam pupae, quae glacie adeo inclusae inventae erant,
felici fato in lepidoptera completa accreverunt. Et vero etiam
erucas, aqua ablatas, migrare, hoc mihi exemplum fuit, quod
aliquando in silva *dem Rosenthale* larva bombycis V. nigri in-
venta sit, quae ibi nunquam occurrit, et ex aliis silvis ad-
vecta esse debet. Non omnis igitur oeconomus in aquae,
litora transgressae adminiculo ponatur spes, nam insecta in-

imica, forte per septimanam integram aquae immersa, tamen ex parte evadunt, idque etiam in aliis animalium ordinibus evenire, nuper edoctus sum, quum, post copiosissimam exundationem, in prato, per sex dies undis tecto, vix regressa aquae vi, talpas copiose fodere conspicerem.

Alia ratione Flora et Fauna per ventos locupletatur, ut erigeron Canadense, plantam, in America natalem, iam ubique agri Lipsiensis crescere, nullam causam nisi ventorum impetum accusamus, qui, semel illata semina, ubique sensim sensimque circumegere. Idem quoque insectis, etsi rarius contingere notum est. Nec vero per ventos plantarum aut insectorum species plane perdidimus; insecta, leviora inprimis saepe ventis ab uno loco in alterum transferri, notum est, exstirpari vero non facile possunt, quum multa semper tardiora loco natali remaneant.

Alia Florae mutatio existit per coeli temperiem; namque aliis annis laete omnes plantas crescere videmus, aliis plurimas mancas et emarcidas; nonnullas adeo desideramus. Ita elatinen Alsinastrum, quae ante multos annos a beato Hedwigio in stagno prope pagum Lindenthal detecta, e decem annis nunquam iterum visa est, anno millesimo septingentesimo nonagesimo quinto eandem ipse copiosam ibidem inveni; sequentibus vero annis ne ramulus quidem apparuit. Ea vero in re

inprimis nivis aut frequentiam aut incipiam plurimum valere, maxime plantae minores, cryptogamicae, docent: similia insectis quoque contingere elucet, quorum vero causae omnino incertius designantur. Nam si quis per humorem, per annum aliquem saepissime cadentem, insectorum catervas dispersas esse diceret, obstat aliorum annorum historia, quibus post crebras pluvias insectorum cohortes frequentissimae prodierunt.

Sed plerumque insectorum turbae minuuntur causis plane ignotis, quae tamen a tempestate pendere debent, licet plerumque non conspicuae. Sed obstat experientiae firmandae validissime nobis, specierum insectorum copia victusque varietas, qua fit, ut quae aliis animalculis noceant, eadem aliis prosint; et perutile foret, cuiusque speciei historiam hoc respectu observari, ut e multarum comparatione ad universalia progredi possimus et extricare, quae coeli solique potissimum mutationes paucis, quae multis speciebus aut prosint, aut exitium parent, quae artis molimina his, illisve obveniant. Sed nimirum caute et circumspicienter de causis exponi debet, quum et simillimarum specierum analogia saepe nobis illudat. Sic enim vere anni 1795., quo non magna insectorum noxiarum turbae exstabant, larvae noctuae oxyacanthae et bima-culosae solito frequentiores erant, etsi aliarum similium, verbi causa, noctuae Paranympphae, promissae, Auguris raritatem

conquerebamus. Diuturna tamen et accurata omnium inspectione specierum historia ita extricari deberet, ut, quae earum mutationum causa sit, inveniatur; sed antequam de causis loquamur, primum explicandum erit, quid mutationum contegerit; qua in re pauca huc usque facta esse dolemus, multa aliis, posteris, nobisque relinquimus. Tot enim adsunt, quae in historia insectorum facta esse accipiamus, quae e causis luculentis derivare non possimus. Sic omnibus, Lipsiae ex annorum plurium serie insecta inquirentibus, testibus, multae species quondam frequentiores, nunc rariores sunt, inprimis ex his decem annis. Sic ante hoc tempus magnae turbae papilionis Iridis, populi, noctuae fraxini, larvarum bombycis processioneae, purpureae aliorumque exstabant, quorum iisdem locis hoc tempore vix unum aut alterum exemplum inveniatur. Iam si hosce casus silvarum rarefactioni, locorum aliorum eversioni et ex parte quoque animalculorum sedulae, per entomophilos susceptae, investigationi, illo tempore avidissimae, tribuamus, ea omnia sufficerent forsitan ad illud explicandum, quod aliquae species evanuerint; sed unde tot specierum caritas originem traxerit, ex istis satis vix perspicio; ea certe, quae mox allegaverim, non satis efficacia esse reor. Neque hisce et similibus observandis solis entomologis, sed maxime quoque oeconomis prodessemus, qui, dum quibus

insecta sibi odiosissima possint pellere, didicerint, ex iis unum vel alterum inveniant, quo, naturam imitati, inimicis liberentur; sed nimirum cum grano salis, hostiumque notitia fulti, ut ne forte pupas monachae aquarum artificiali immissione, suum inductione tollere constituent, aut chrysalides piniperdae in cortice quaerant.

Restat una res, quae insectorum propagationem impediat aut promoveat, migrationes puto, quas, etsi nulla a me unquam conspecta sit, e fide tamen tot tamque celebrium hominum, multum valere largior. Sed currendo istae fieri non facile possunt, nisi forte larvas bombycis processionae ex una in alteram arborem repsisse, migrare dicere velimus, quod ad universae cuiusdam regionis casus referri nequit; sed migrationis voce hoc designandum est, si e loco remotiore subito magna animalculorum copia simul ad alterum se contulit. Sed hoc non potest fieri nisi per insecta apte volitantia, quae itinera moliantur, aut valde levia, quae ventu impetuosissimo abripiantur; quod posterius ne notioni quidem exhibitae respondet, quum et raro per ventos insecta unius speciei multa simul abripi sciamus, et ventorum rapinas non magis, quam aquae transportationes, migrationum, activi modi vocabulo ornare audeamus. Nonnunquam vero etiam migrare insecta crediderunt, subito eodem tempore in con-

spectum prodeuntia, licet eodem loco natā et educta, huc usque tantum abscondita et imperfecta. Et est omnino res, animadversu singularis, saepe insectorum perfectorum cuiusdam speciei, ingentem molem uno die excurrere, quae eadem diverso tempore metamorphoseos initia subiissent, et facillime hoc patet, in erucis arte nutritis et oculorum obtutui subiectis. Saepe insecta in chrysalidis carcerem diversis diebus condita, ex improvise uno die omnia perfecta et matura aufugiunt. Eius vero phaenomeni causam eruere constanter repudiarem; autumo tamen, insecta in chrysalide manere etiam posteaquam plene formatae sint et excreverint, usque dum aëris sibi optime convenientis sensu excitati, arbitrio suo carceres rumpant; quò enim alio pacto fieret, ut multa simul eadem hora progrediantur; nec ea solum, quae per tantum temporis intervallum inertia claustris teneantur, ut unius aut aliquorum dierum spatium, tempori, quod ad ipsa evolvenda necessarium sit, partem notabilem subtrahat aut addat: sed ea quoque quae tantum per paucas septimanas et vel adeo per octo dies solos quiescant. Iam quum, quae uno die egrediantur, diverso tempore in puparum formam transierint, sequitur, ea diverso temporis spatio egere, ad corporis partes satis evolvendas; sed quum omnia perfecta compareant: nihil aliud mihi fingere possum, nisi alia, eaque prius in

nidulum ingressa et ocyus efformata, tandiū sponte remansisse usquedum coeli temperiem sibi bene convenire praevidissent. Non dicat aliquis, esse hoc causū fortuito tribuendum, siquidem sexcenties observavi; nec omnibus perpensis interdicere mihi potui, quominus tempestatis causam in ius vocarem. Nempe saepissime id fieri perspexi tempestate humidiuscula et calidiore, frigora sicca aut aestus vehementes insequente; idque commodo simul animalium summo est; tum enim, quae terra reconduntur hanc molliorem facilius pertundunt, quae filis sese ubique cingunt, per ea aptius membra protrudunt, omnia vero melius artus evolvunt, quorum in vasis humorum ingens copia circumferenda, ridigitate vasorum, per exsiccationem aut frigoris iniuriam orta, stagnat, et ita omne incrementum impeditur: aëre miti leniterque humido placide se expandunt alarum rudimenta.

Sed satis superque perspectum habeo et expertum, difficilis diuturnique laboris esse eiusmodi observationes: quare et propositi laboris molesti, et non ex asse conditi, veniam non omnem defuturam sperare liceat. Saepe hoc mente volebam, omnium classium insecta ita studiose examinare, eorumque vitae victusque rationem tam indefesso studio, quo in muscorum historia, mire impedita, Hedwigium, heu nobis ereptum, enitentem admirabamur, omni modo persequi, ut non

ludibrio otia trivisse sed parvorum studio historiam naturalem et inprimis physiologiam utiliter ditasse, usuque communi aliquid saltem praestitisse, de me profiteri possim. In iisque ita versandum arbitrabar, ut primum specierum omnium locum et nomina systematica cognoscerem, quo magis, quae nam animalcula observarem, eluceret, deinde quae cuique speciei singularia et propria sint; tum, quae multa inter se communia habeant; tandem quae generalia exinde colligi queant, enuclearem. Eius quidem propositi iam prima rudimenta exhibeo et de agri natura primum egi. Proximum est, ut de systematica insectorum notitia, quae sciam, afferam; cuius occasio proxime edendi facultatem largietur. Et omnino laetor in elaboranda topographia, olim plena et absoluta proponenda, non uni soli dimicandum esse, sed fautorem et doctorem me nactum esse V. Cl. LUDWIGIVM, qui et sua rerum naturalium scientia eximia, et studio indefesso et sibi amicorum concursu, naturalem Saxoniae conditionem scrutetur et notam reddat. Quorum quidem laborum primitias, in libro *), nuperrime societatis Linneanae nomine edito et catalogum insectorum Saxoniae in-

*) *Erste Aufzählung der bis jetzt in Sachsen entdeckten Insekten. Im Namen der Linnéischen Societät herausgegeben von D. Christian Friedrich Ludwig, Prof. zu Leipzig. Leipzig, in Commission bey Rabenhorst. 1799.*

digenorum sistente, naturalis historiae cultores acceperere; iuxta quem catalogum meum tolerari posse propterea sperare ausus sum, quia iste meus partem Saxoniae singularum complectitur, et ad topographiae delineationem requiri videtur; maxime vero quia V. Cl. Ludwigius, fautor summe colendus, ut tentaminis huius, quantum possem, publice proponerem, auctor suasorque fuit. Iamque scripsi eorum quae iusto nomine indita et a me ipso in agro nostro inventa habebam, recensum; quorum quidem copia augeri facile potuisset, si Clar. Ludwigii, Eberhardi, defuncti e paucis abhinc septimanis, et Zschachii coleopterorum ditiora receptacula sufficiente otio perlustrare, ab iisque viris, quantum vellem, discere potuissem; nam deficiente temporis otiique libertate, dierum hibernarum obscuritate, impeditus, quae illi possident, vix fugitivo oculo percurrere potui, nedum studiose examinare, comparare et super iis interrogare; etsi illorum virorum facilitatem et amicitiam erga me, non demeritam, collaudandum habeo. Neque praetermittere hic occasionem possum Dominum Zschachium publice iterum precandi, velit ea, quae de insectis Lipsiensibus collegerit et erudite conscripserit, quippe rerum novarum, observationum accuratarum, notarum gravissimarum plena, publici iuris facere. Quod si fecisset, mea conamina aut suppressissem, aut mire adiuta, meliora proposuissem.

